

UPUTSTVO ZA PODNOŠENJE PRIJAVA U VEZI SA IZBORNIM PROCESOM

Svrha posebnog kanala za prijavljivanje

Kancelarija za prevenciju korupcije i koordinaciju aktivnosti na suzbijanju korupcije u Brčko distriktu BiH (u daljem tekstu: Kancelarija) uspostavlja poseban kanal za prijavljivanje sumnji na koruptivno ponašanje i druge nepravilnosti povezane sa izbornim procesom.

Cilj posebnog kanala je omogućiti građanima i drugim zainteresovanim licima da na jednostavan i siguran način Kancelariji dostave informacije o radnjama i postupanjima za koje smatraju da mogu ugroziti integritet i zakonitost izbornog procesa.

Posebna elektronska adresa za prijave u vezi sa izbornim procesom odvojena je od redovnog kanala Kancelarije za prijavljivanje koruptivnog ponašanja i namijenjena je prijavama koje su neposredno povezane sa izbornim procesom.

Šta se može prijaviti?

Kancelariji se mogu prijaviti informacije i saznanja o radnjama ili postupanjima koja mogu ukazivati na koruptivno ponašanje ili druge nepravilnosti povezane sa izbornim procesom, a naročito:

- zloupotreba javnih sredstava i drugih javnih resursa u vezi sa izbornim procesom;
- korištenje službenog položaja, funkcije ili ovlaštenja radi nedopuštenog uticaja na izborni proces ili izbornu opredjeljenje birača;
- korištenje službenih vozila, prostorija, opreme, zaposlenih ili drugih javnih resursa za ostvarivanje nedopuštene političke ili druge koristi;
- davanje, nuđenje, zahtijevanje ili primanje novca, poklona, usluga ili drugih koristi radi uticaja na izbornu opredjeljenje;
- pritisci, prijetnje, ucjene ili drugi oblici nedopuštenog uticaja na birače;
- pogodovanje određenim licima ili subjektima korištenjem javnih ovlaštenja ili resursa;
- druge radnje i postupanja koja mogu ukazivati na koruptivno ponašanje ili druge nepravilnosti povezane sa izbornim procesom.

Prijavilac nije dužan da zna da li određena radnja predstavlja povredu konkretnog propisa, koruptivno ponašanje ili drugi oblik nepravilnosti. Dovoljno je da jasno i što preciznije opiše činjenice i okolnosti na kojima zasniva svoju sumnju.

Ko može podnijeti prijavu?

Prijavu može podnijeti svako fizičko ili pravno lice koje raspolaže informacijama ili saznanjima o mogućoj nepravilnosti povezanoj sa izbornim procesom.

Prijava se može podnijeti uz navođenje identiteta prijavioca ili anonimno.

Kako podnijeti prijavu?

Prijava se podnosi putem posebne elektronske adrese Kancelarije:

prijavikorupciju.izbori2026@aktbd.ba

Prijava se može podnijeti u slobodnoj formi.

Radi efikasnijeg postupanja, preporučuje se da naslov elektronske poruke bude:

„Prijava – izborni proces“

Ukoliko prijavilac želi, u elektronskoj poruci može odmah navesti da prijavu podnosi anonimno.

Šta prijava treba da sadrži?

Kako bi Kancelarija mogla što efikasnije provjeriti navode iz prijave, preporučuje se da prijava, kada je to moguće, sadrži:

- opis događaja ili radnje koja se prijavljuje;
- datum i vrijeme kada se događaj desio ili period u kojem se radnja odvijala;
- mjesto na kojem se događaj desio;

- podatke o licima ili subjektima na koje se prijava odnosi, ukoliko su poznati;
- opis načina postupanja i okolnosti iz kojih proizlazi sumnja na nepravilnost;
- podatke o licima koja mogu potvrditi navode prijave, ukoliko su poznati;
- podatke o dokumentima i drugim dokazima kojima prijavilac raspolaže;
- druge informacije koje mogu biti od značaja za provjeru navoda.

Prijava ne mora sadržavati pravnu kvalifikaciju prijavljene radnje niti navođenje odredbi propisa za koje prijavilac smatra da su povrijeđene.

Dostavljanje dokaza i dokumentacije

Uz prijavu je moguće dostaviti dokumentaciju i druge materijale koji mogu biti od značaja za provjeru navoda.

To naročito mogu biti:

- fotografije;
- video-zapisi;
- dokumenti i akti;
- računi i druga finansijska dokumentacija;
- elektronska pošta;
- SMS i druge poruke;
- snimci ekrana;
- internet objave i drugi elektronski sadržaji;
- drugi materijali koji mogu pomoći u provjeri navoda.

Prijavilac nije dužan pribavljati dokumentaciju kojoj nema zakonit pristup. Ukoliko raspolaže informacijom o tome gdje se određeni podaci ili dokumentacija nalaze, preporučuje se da takvu informaciju navede u prijavi.

Anonimne prijave

Kancelarija omogućava podnošenje anonimnih prijava.

Anonimna prijava je prijava iz koje se ne može utvrditi identitet prijavioca.

Kancelarija će postupati i po anonimnim prijavama ukoliko sadrže dovoljno konkretnih i provjerljivih informacija na osnovu kojih se može izvršiti provjera navoda.

Kancelarija neće preduzimati aktivnosti usmjerene na otkrivanje identiteta anonimnog prijavioca.

Kod podnošenja anonimne prijave preporučuje se da prijavilac navede što više konkretnih podataka i dostavi raspoložive dokaze, imajući u vidu da Kancelarija u takvom slučaju ne može zatražiti dodatna pojašnjenja ili dopunu prijave od prijavioca.

Zaštita identiteta i ličnih podataka

Kancelarija preduzima mjere radi zaštite identiteta prijavilaca i zaštite ličnih podataka do kojih dođe u postupku po prijavi, u skladu sa zakonom.

Podaci o identitetu prijavioca i drugi lični podaci neće se otkrivati neovlaštenim licima, osim kada je njihovo otkrivanje dopušteno ili nužno u skladu sa zakonom.

Postupanje Kancelarije nakon prijema prijave

Nakon zaprimanja prijave, Kancelarija će izvršiti preliminarno razmatranje prijave i procijeniti da li ona sadrži dovoljno informacija za dalje postupanje.

U okviru svojih zakonskih nadležnosti, Kancelarija može:

- prikupljati dodatne podatke i informacije;
- provjeravati navode iz prijave;
- pribavljati relevantnu dokumentaciju;
- izvršiti uvid u javno dostupne registre, baze podataka i druge izvore informacija;
- analizirati relevantne propise i okolnosti konkretnog slučaja;
- preduzimati druge aktivnosti u okviru svojih zakonskih ovlaštenja.

Ukoliko Kancelarija utvrdi postojanje činjenica i okolnosti koje ukazuju na koruptivno ponašanje ili druge nepravilnosti, preduzeće odgovarajuće aktivnosti u okviru svojih zakonskih nadležnosti. Prijavilac čiji je identitet poznat može biti obaviješten o statusu preduzetih aktivnosti, u skladu sa zakonom i prirodom konkretnog postupanja.

Važna napomena

Podnošenje prijave ne znači da je prijavljena radnja utvrđena kao koruptivno ponašanje, nepravilnost ili drugo nezakonito postupanje.

Kancelarija navode iz prijave cijeni na osnovu dostupnih činjenica, podataka i dokumentacije, u okviru svojih zakonskih nadležnosti.

Prijavu je potrebno podnijeti savjesno i u dobroj vjeri, na osnovu informacija i saznanja kojima prijavilac raspolaže.

Kontakt

Posebna e-mail adresa za prijave u vezi sa izbornim procesom:

prijavikorupciju.izbori2026@aktbd.ba

Poseban kanal za podnošenje prijava u vezi sa izbornim procesom, uključujući posebnu e-mail adresu, biće u primjeni do potvrđivanja izbornih rezultata od strane nadležnog organa.

Na postupanje po prijavama podnesenim putem ovog kanala primjenjuju se odredbe Instrukcije o postupanju po zaprimljenim podnescima sa indicijama koruptivnog ponašanja Kancelarije za prevenciju korupcije i koordinaciju aktivnosti na suzbijanju korupcije u Brčko distriktu BiH.

Instrukciju možete preuzeti na sljedećem [linku](#).

Kancelarija je na raspolaganju za dodatne informacije u vezi sa načinom podnošenja prijave i postupanjem po zaprimljenim prijavama.